

## Ricunuscenza

Stanotte 'a dint'o lietto cu 'nu strillo  
aggio miso arrevuoto tutt'a casa,  
mme so' mmiso a zumpà comme a n'arillo...  
E nun me faccio ancora persuaso.

Ma comme, dico io po', cu' tanta suonne,  
i' mme so' ghiuto a ffa' 'o cchiù malamente;  
sti suonne songo suonne ca te pònno  
fa' rummané stecchito comme a niente.

I' steve allerta 'ncoppa a 'na muntagna  
Tutt'a 'nu tratto sento 'nu lamiento.  
'O pizzo addà stev'i' era sulagno...  
Dicette ncapo a me: E chisto è 'o viento!

Piglio e mme mengo pe' 'nu canalone  
e veco sott'a n'albero piangente  
'nu fuosso chino 'e prete a cuppulone...  
e sotto a tutto steva 'nu serpente.

-Aiuto! Aiuto! - 'O povero animale  
se mettette 'alluccà cu tutt'o sciato!  
Appena mme vedette: - Menu male!...  
Salvatemi! I' mo moro asfessiato! –

- E chi t'ha cumbinato 'e sta manèra? –  
Il'addimannaje menti 'o libberavo.  
- E stato 'nu signore aieressa –  
mme rispunnette, e ggìa se repigliava.

- Si nun era pe' vvuje', i' ccà murevo.  
facitave abbraccià, mio salvatore! -  
Mme s'arravoglia attorno e s'astrigeva  
ca n'atu ppoco mme schiattava 'o core.

Lassame! - Lie dicette -'O vvj' ca i' moro? –  
E chianu chianu mme mancava 'a forza,  
'o core mme sbatteva... Il'uocchie 'a fore,  
mentre 'o serpente chiù strigeva 'a morza!

- Chisto è 'o ringraziamento ca mme faje?  
Chesta è 'a ricunuscenza ca tu puorte?  
A chi t'ha fatto bbene chesto faje?  
...Ca si' cuntento quanno 'o vide muorto!

-Amico mio, serpente i' songo nato!...  
...Chi nasce serpe è 'nfamo e senza core!...  
...Perciò t'aggia mangià! Ma t'hè scurdato  
.ca ll'ommo, spisso, fa cchiù peggio ancora?!